

**“Ўзбекгидроэнерго” акциядорлик жамиятининг
номдор стипендиялари тўғрисида
НИЗОМ**

1. “Ўзбекгидроэнерго” акциядорлик жамиятининг номдор стипендияси бу - Ислон Каримов номидаги Тошкент давлат техника университети (кейинги ўринда ТДТУ), Тошкент ирригация ва қишлоқ хўжалигини механизациялаш муҳандислари институти (кейинги ўринда - ТИҚХММИ), шунингдек, Тошкент архитектура-қурилиш институтининг (кейинги ўринда - ТАҚИ) илмий-тадқиқот ишларига мойил, илмий-техник, техник ва ихтирочилик ижодиётида, олимпиадаларда, танловларда, таълим муассасасининг ижтимоий ҳаётида фаол иштироки билан ўзларини кўрсатган, жамоат ишларида фаол иштирок этаётган талабаларига бериладиган стипендиядир.

2. Номдор стипендия олий ўқув юртлари талабаларини ижтимоий қўллаб-қувватлаш бўйича қўшимча чора-тадбирлардан бири бўлиб, гидроэнергетика иншоотларини қуриш ва ишлатишда университет ва институтларнинг энг билимдон, техник ижод ва ихтирочиликка мойил бўлган талабаларини жалб қилишга қаратилган.

3. Стипендияни тўлаб бериш ҳар йили 1 сентябрдан бошлаб бир йил муддатга амалга оширилади. Стипендиантларнинг таркиби ўқув йили натижаларига кўра, номзоднинг ўқув фанларини ўзлаштириши, илмий-тадқиқот ишларида иштироки ва ижтимоий фаолияти ҳисобга олинган ҳолда ҳар бир ёзги сессиядан сўнг кўриб чиқилади.

4. Номдор стипендиялар Ислон Каримов номидаги Тошкент давлат техника университети, Тошкент ирригация ва қишлоқ хўжалигини механизациялаш муҳандислари институти ҳамда Тошкент архитектура-қурилиш институтининг охириги икки имтиҳон сессиясида энг яхши натижаларни кўрсатган ва илмий-тадқиқот, илмий-техник ижод, олимпиадалар, танловларда, жамоат ишларида фаол иштирок этиб келаётган номзод-талабаларга берилади.

5. Номдор стипендияларга номзодларни танлаш олий таълим муассасаси ректорининг буйруғи билан тузилган танлов ҳайъати томонидан амалга оширилади.

6. Номдор стипендияга тақдим этиш учун номзодлар бакалавр ва магистратура босқичларида қуйидаги йўналиш ва мутахассисликлар бўйича таҳсил олаётган талабалар орасидан танланади: “Энергетика” (гидроэнергетика), “Гидротехника қурилиши” (сув хўжалигида), “Суғориш тизимларида гидротехника объектлари”, “Ишлаб чиқариш жараёнларини автоматлаштириш” (соҳалар бўйича), “Гидротехника қурилиши” (дарё иншоотлари ва гидроэлектрстанциялар қурилиши), “Бино ва иншоотлар қурилиши”, “Дизайн” (бино ва иншоотлар, ландшафт дизайни), “Конструкторлик иши” (металл, қурилиш материаллари, технологик жиҳозлар конструкциялари).

7. Номзодга стипендия тайинлаш учун олий таълим муассасаси Илмий кенгаши қарори, ариза берувчининг ютуқларини тасдиқловчи ҳужжатлар (имтиҳон (рейтинг) дафтарчаси, сертификатлар, ихтиролар учун патентлар, инновация таклифлари, дипломлар, кўргазмалар ва танловларда иштирокини тасдиқловчи ҳужжатлар), университет (институт) ректори томонидан имзоланган тавсиянома Жамият бошқаруви раисига расмий равишда киритилади.

8. Олий таълим муассасаси Илмий кенгаши томонидан “Ўзбекгидроэнерго” АЖ бошқаруви раиси номига киритилган ҳужжатлар Жамиятнинг махсус Комиссияси йиғилишида кўриб чиқилади, шундан сўнг маълум бир талабгорга стипендия тайинлаш тўғрисида қарор қабул қилинади. Стипендияларни бериш Комиссия қарорига асосан Жамият бошқаруви раисининг буйруғи билан расмийлаштирилади.

9. Номдор стипендияни тайинлаш олий таълим муассасаси ректорининг буйруғи билан амалга оширилади.

10. Стипендияни тўлаш “Ўзбекгидроэнерго” акциядорлик жамиятининг маблағлари ҳисобидан олий таълим муассасаси ҳисоб рақамига пул кўчириш орқали амалга оширилади.

11. Ҳар бир таълим муассасасига 5 та стипендия ажратилади: магистратура босқичининг биринчи ва иккинчи курс талабалари учун, бакалавриат босқичининг иккинчи, учинчи ва тўртинчи курс талабалари учун.

12. Ҳар йилги стипендия белгилашда, Низомнинг 8-бандида белгиланган махсус Комиссия қабул қилган кундаги меҳнатга ҳақ тўлашнинг энг кам миқдоридан фойдаланилади. Бунда, стипендиялар иккинчи курс талабаларига ойига-1,0; учинчи курс талабаларига-1,3; тўртинчи курс талабаларига-1,6 баравар миқдорида тўланади. Магистратура босқичида таълим олаётган талабаларга энг кам ойлик иш ҳақининг-1,9 баравари миқдорида номдор стипендия берилади ва ўқув йили давомида ўзгаришсиз қолади.

13. Номдор стипендиялар ўз эгаларининг конун ҳужжатларида белгиланган ёки алоҳида юридик шахслар ва фуқаролар томонидан тасдиқланган бошқа стипендиялар олиш ҳуқуқини бекор қилмайди.

14. Стипендия тўловларини тугатиш қуйидаги ҳолларда муддатидан олдин амалга оширилади:

талаба таълим олишни тугатиши, кундузги таълим шаклидан бошқа (кечки, сиртки, масофавий) таълим шаклига ўтиши;

стипендия бериладиган асослар йўқотилиши;

“Ўзбекгидроэнерго” АЖ номдор стипендияси соҳиби унвонига мос келмайдиган маъмурий ва жиноий ҳуқуқбузарликлар ҳамда бошқа ҳаракатларни содир этиш, университет, институт ички тартиб-қоидаларининг талаба томонидан қўпол равишда бузилиши;

15. Номдор стипендияларни олиш ҳуқуқини йўқотган талабалар ўрнига янги талабгор номзодларни кўрсатиш ушбу Низомда белгиланган тартибда амалга оширилади.

16. Мазкур Низом “Ўзбекгидроэнерго” АЖ ва Тошкент давлат техника университети ўртасида 2017 йил 27 ноябрда тузилган 01/11-2017-сонли, “Ўзбекгидроэнерго” АЖ ва Тошкент ирригация ва қишлоқ хўжалигини механизациялаш муҳандислари институти ўртасида 2018 йил 28 августда тузилган 08/1-2018-сонли, шунингдек “Ўзбекгидроэнерго” АЖ ва Тошкент архитектура-қурилиш институти ўртасида 2018 йил 1 мартда тузилган 01/03-2018-сонли ҳамкорлик шартномаларига мувофиқ ишлаб чиқилди.

17. Мазкур Низом “Ўзбекгидроэнерго” АЖ Ягона акциядори қарори билан, ҳамкорлик шартномалари иштирокчилари - томонларнинг келишувига кўра бекор қилиниши ҳамда томонлар келишувига мувофиқ Низомга ўзгартириш ва қўшимчалар киритилиши мумкин.